



14562

kat. komp.

III

Mog. St. Dr.

P

aus. I.

*Biezanowski Stanisław; bra Lubomirski.*

PANEG. et VITAE

Polon. Fol.

№ 612.



Biblioteka Jagiellońska



stdr0002492



A R A  
LVBOMIRSCIANA.

Pretiosis Heroicarum virtutum insignijs,  
& Othomannicis spolijs,

A D O R N A T A,

Atq; ad Feralem Vrnam,

*ILLVSTRISSIMI olim ac MAGNIFICI DOMINI,*

D. STANISLAI  
LVBOMIRSKI,

Comitis in Wisnicz,

PALATINI CRACOVIENSIS,

Scepufen. &c. &c. CAPITANEI,

Viri de Republica Polona meritissimi,

Summo cum omnium dolore extincti,

D E D V C T A,

Ad exemplumq; seræ posteritatis,

Et æternam tanti Herois memoriam,

P E R

STANISLAVM BIEZANOWSKI Leopold:

*Art: & Philos: in Alma Vniuersitate Crac: Baccalaureum,  
immortalitati*

C O N S E C R A T A.

*Anno à Partu Virginis 1649. Die 14. Iulij.*

C R A C O V I Æ,

Apud LVCAM KVPISZ S. R. M. Typograph.



In Stemma Illustriss: Domus  
L V B O M I R S C I A N Æ.



Debeat excelsis quod SRENIAVA nubibus ortum,  
Causa latet, causam scit mea Musa piam.  
Postquam fidereis steterat domus æmula tectis  
Aula triumphantis VISNICIANA Dei;  
Vt sua Rex Superum Palatia visere posset,  
SRENIAVIIS venit velificatus aquis.  
Astra igitur spectat Flumen; nam sæpius indè  
VISNICIVM Fluuio hoc nauigat ipse DEVS.



Franciscus Petricus Eloq. &  
Philos. Auditor.





ILLVSTRISSIMIS ac MAGNIFICIS DOMINIS,

**D. ALEXANDRO,**

Supremo Stabuli Regni Præfecto,

Sendomirien. Niepolom. Zatorien. &c.

CAPITANE O.

**D. GEORGIO,**

Cracouien. Scepusien. Chmielnicen. &c.

CAPITANE O.

**D. CONSTANTINO,**

Sandecen. Bialocerkiew. &c.

CAPITANE O.

COMITIBVS in Wiśnicz & Iárosław,

**LVBOMIRSCIIS,**

*Illustriſſimi olim ac Magnifici Domini,*

**D. STANISLAI LVBOMIRSKI,**

Comitis in Wisnicz,

PALATINI CRACOVIENSIS.

Viri de Republica Polona meritissimi

F I L I I S.

Dominais meis & Patronis Ampliſſimis.



**S**ERVARE poſteritati, quæ præſentes miramur,  
& ſeris nepotibus conſulere, in ijs quorum rariſſima fertilitas,  
nemini magis incumbit, quàm felicifſimo gloriæ vindici litte-  
ratorum calamo, Illuſtriſſ. ac Magnifici DOMINI. Quid-  
quid enim immortalè eſt, nec tot ſæculorum iniuriâ deprava-  
tum, niſi diuinitatem quãdam à Sapientum genio mutuafſet,  
pridem iſſdem cineribus, quibus & mortalia ſepultum periſſet. Ex quo litteræ,  
& earum amatores Orbi apparuerũt, nulla etas tam à primis remota eſt tem-  
poribus, quæ Maiorum aurea ſæcula ſcriptorum calamis conſignata, non inui-  
deat mireturq̃. Ac proinde nihil nos poſteri in Maioribus noſtris moleſtiùs in-



ensamus, quam quod nobilissima ingenia non aluerint, quorum beneficio vindicati ab interitu, è cineribus feliciter triumpharet. Nam mors, quæ amplissimas opes, titulos, & cetera nobilitatis insignia deprædatur, nihil reuerentius colit, quam monumenta scriptorum; & quamuis furenti impetu neminem excipiat, postquam ad Sapientum opera peruenerit, nullibi prudentior est, quia nullibi quam in litteris immortalia nascuntur, supra quæ nulla potestas Libitina. Peruenerat ad aures Palladis nostræ, hoc supplicantis posteritatis desiderium, ut quoniam factorum lege felicitas hæc illi non cõtingerat, **LVBOMIRSCIANÆ** virtutis miracula intueri, at saltem liceret thesauro litterarum asseruata tantæ gloriæ simulachra, sequentibus sæculis, & laudare, & imitari. Neq̃ enim (vox erat posterorum) quæ præclara vobis contingere, vestra tantum sunt; nobis hæc maxime debentur, quia nemo præstantissimum quidquam aggrediretur, nisi speraret futuræ ætatis memoriam, æternum duraturæ gloriæ sacrarium fore. Approbauimus vota, tam obnixè à nobis **LVBOMIRSCIANAM** felicitatem exposcentia; & quamuis didiceram ego Alexandrum Macedonem Apellis nonnisi penicillo pingi, Lysippi manu sculpi voluisse, audacissime tamen profiliui, & securus de humanitate vestra Illustriss: & Magnifici **DOMINI**, quæ hereditaria **LVBOMIRSCIIS** est, Aram Illustrissimo **PARENTI** vestro erexi, & in ea quidquid immortale habuit, consecraui. Miramini forsitan tam arduo operi infantiam meam humeros supposuisse, cuius onere etiam felicissimi premerentur Oratores; ast ego neminem adhuc pueris balbutire inuidentem aduertis; imo dulcius ea plerumq̃ insuunt, quæ innocens simplicitas sine cultu, cãdide tamen protulerit. Nec verò licuit mihi alibi quam in sinu vestro Illustriss: ac Magnifici **DOMINI**, miraculum istud æui nostri, Illustrissimũ **PARENTEM** vestrum deponere. Nullibi ille augustius recondi potest, quam in pectoribus Filiorum; nullibi securius, quam in vestro Illustriss: ac Magnifici **DOMINI**, quod viuens tot laboribus erexerat, Sacrario conuiescet. Ceteris longæua memoria Obeliscis, Mausoleis temporũ vetustate absumendis ematur: Illustrissimo **PARENTI** vestro præter admirandas virtutes, tota ex Vobis Illustriss: ac Magnifici **DOMINI** crescet immortalitas; eò pretiosior illustriorq̃, quo magis quidquid à fortune dotibus largiter atq̃ effuse in posteros traducitur, leue atq̃ euandidum habetur; secus verò quæ in Filiorum virtute obsignamus, hæret nexus licet soluantur cadauera; nec quidquam temporis auaritiæ in ea licet, quæ Parentum manibus in generosa progenie plantata sunt. Itaq̃ quemadmodum olim circa Constantij Imperatoris Aram, Aquilæ æternam illius memoriã designantes pingebantur; Aquilas Vos quoq̃ Illustriss: ac Magnifici **DOMINI** supra Aram meam Orbis suspiciat; & dum Illustriss: **PARENTIS** Vestri gloriam expansis alis conseruabitis, liceat quoq̃ teneriori Palladi meæ, sub vmbra earum ab æstu publico declinare.

Illustrissimarum ac Magnificarum D.D. V.V.

addictissimus cliens

**STANISLAUS BIEZANOWSKI**

Art: & Philof: Baccalau.





# A R A LVBOMIRSCIANA.



VAS non ita pridem Atlanti Sarmatico, Regum Europæ delicio, VLADISLAO IV. REGI nostro olim felicissimo, lachrymas effudimus, easdem nunc HEROVVM gemmæ, vtriusq; prudentiæ oraculo, ILLVSTRISSIMO STANISLAO LVBOMIRSCIO dedicamus. Nihil vna in Rebus publ. calamitas proficit, nisi continuata serie aliquot Olympiades squalori publico cedant. Tàm diuturnâ & delicatâ pace, quâ temporibus VLADISLAI fruebamur, hoc Sarmatæ promeruimus, vt intra vnus anni curriculum, omnium ætatum, omnium imperiorum clades & miseras ferre asuescamus. Non iam sterilitatem incusent scribentium calami; sæcundum hoc omnis infelicitatis sæculum est, superat & Historicorum prudentiam, & eloquentiam Oratorum. Vix annua nobis redijt memoria, ex quo septemtrionis nostri miraculum cælestem patriam repetijt, en rursus fatalis periodus pretiosissimum è Sarmatiæ thesauro abstulit vnionem. Credat iam, quisquis nondum fidem apposuit, fortunam leuissimo Orbi insistere; credat nullibi copiosiores illius messes inueniri, quàm in Imperijs, quibus annosa canities florem eripuit iuuentutis. Verùm non incusanda est, quia cæca fortuna; imò tàm multorum Imperiorum victrici adscribenda est singularis quædam prudentia: Præuiderat forsân, vt est ingeniosa, Polonos fortitudine & surgente SERENISSIMI CASIMIRI REGIS felicitate recreatos, VLADISLAI damnum & memoriam sensim deposituros; renouat proin catastrophën, rapit præstantissima Regni fundamenta, noua animis infligit vulnera, vt quantæ beatitudinis sæculum VLADISLAI fuerit, præsentium calamitate edocti consideremus, nec ad primam blandioris fortunæ serenitatem, subsequentiâ vt incerta & plerumq; luctuosa metiamur. Neq; verò ad renouandam in pectoribus omnium doloris vehementiam, aptius quidpiam fata inuenire

A

potu-



potuerunt, quàm dum ille nobis per summam cæli inclem-  
tiam ereptus est, in cuius pectore & armata & togata patria sua-  
uissimè recumbebat, cuius consilio æquè minima ac maxima  
quoties nutabāt firmabātur, ad cuius exemplar modo primum  
è cunabulis egressi Ciues vitam, indolem, prudentiam, & quid-  
quid Heroes dicet, conformabant. Omnino hæc anima VLA-  
DISLAO iungi debuerat, nisi mica quædam benignitatis fato-  
rum, eam per hæc tempora periculosissima seruasset. Debe-  
bas MAGNE HEROS vt victoriarum, ita mortis Principi Tuo  
comes esse. Verum nondum Sarmatæ adeò derelicti fuimus;  
sublato Atlante, dedit Herculem & seruauit ille, cuius nutu  
imperia crescunt, & minuuntur: Vixit hæc anima, & quamuis  
pridem cælo destinata fuit, cōsq; tamen generosum retinuit  
spiritum, donec fauore cælesti electus SERENISSIMVS REX  
CASIMIR VS par tanto oneri succederet, & fessas languentis  
corpusculi vires, Heroicā virtute subleuaret. Reddita proinde  
quàm in gremio gestauerat suo patria, felicissimus euolauit LV-  
BOMIRSCIVS: & ne diutius in Capitolio æternitatis trium-  
phanti VLADISLAO inuideret, erupit è carceribus hisce, vtri-  
usque gloriæ victrici corona laureatus. Et ille quidem dum  
sic mortalibus valedixit, nobis forsā nihil præter lachrymas,  
aut suspiria reliquit: sed nequaquam populare istud obsequi-  
um, doloris nostri vehementiam, aut leniet, aut testabitur; Hu-  
manum istud esse fateor, lachrymarum vbertate magnitudinē  
interni affectus ostentare. Ast certum est, cum aliquid im-  
mortale nobis eripitur, nullam in nobis lachrymulam superes-  
se, quæ præ nimio cordis cruciatu non exaruerit. Tanto He-  
roi si oculorum non nisi scaturigines, pro ingentibus meritis,  
consecraremus, nihil nos à vulgo fecerneret. Non ille tam præ-  
clara facinora propter momentaneum dolorem perfecerat; æ-  
ternum ille, diuinum aliquid moliebatur, quoties pro Sarm-  
ticæ gentis incolumitate, fortunas & salutē propriam mille pe-  
riculis deuouebat. Lachrymentur ergo quibus non est aliud re-  
medium doloris; nos quia maiora & augustiora nouimus, ea  
Sarmatico huic Herculi offeramus. Aram ego virtutum eius  
insignijs, & victi terrarū Latronis Osmani spolijs conspicuam  
adornabo, eamq; seræ posteritati tanquam Polycleti statuam,  
omnis gloriæ absolutum specimen, consecrabo. Nouellum  
mystam, & necdum tanto oneri parem, quisquis non ad vnguē  
omnia disposuisse aduerterit, aut imbecillitati, aut doloris ma-  
gnitudini, aut rerum Maiestati si ignouerit, prudentem appel-  
labo.

Si in



Si in Rebuspublicis par Heroum fertilitas necessitati responderet, nec vota omnium toties in summa calamitate fortissimos Atlantes desiderantium frustrarentur, facile nobis esset quæ in vno perdidimus alterius felicitate pensare, neque adeo fatales clarissimorum Virorum periodos deplorandas esse censeremus; At verò quia vitio sæculi & hominum, præstantissimi Patriæ Ciues annulo inscribi possunt, quia Rempublicam nonnisi dotatam amamus, quia vbertatem Magnarum mentium beneficio cælesti Patriæ donatam rarò pretiosè æstimamus; licitum imò omninò debitum est, quoties augustum aliquid è Patria tollitur, toties monumenta illi, Mausolæa, aut Aras meritorum odoramentis refertas, ad deuincendos posterorum animos, excitare. Magnum est enim donum, inæstimabile, ac proinde rarissimum Catones, Scipiones, Marcellos interrupto ordine in Rebuspub. suc cedere: Aurea illa ætas, quæ tantarum mentium feracissima; nec ob aliam causam toties egestatem publicam deploramus, dum parem ad pericula animum inter tot millia requirimus, cui aut læsa, aut spoliata, aut quod nunc Sarmatiæ contigit, semianimis Patria innitatur. Experimur toties quemadmodum cælum alioquin liberale, & à tot sæculis terrenæ addictum necessitati, adeo tamen à sueta nonnunquam degenerat propensione, vt cum cætera affatim imperijs tribuat, solam Magnorum Virorum caritatem facit; sine quibus etiam gemmis ornata felicitas, ludibrium est fortunæ, cuius nullibi copiosior messis, quàm in Republica rerum vbertate, securitate, & otio beata, solo tamen Heroum ornamento destituta. Senectutem tunc imperiorum cognoscere licet, & breui morituram felicitatem, cum Viris consilio, & manu promptissimis destituimur: Nam regna, quia ætatem humanam imitantur, habent quoq; pueritiæ cunas, adolescentiæ amœnitatem, virilis ætatis fortitudinem, habent senectutis incommoda, & propè diem affuturi occasus vaticinia deploranda. Atq; vt in adolescentia viriliq; ætate homini firmitus robur, generosior virtus est; ita Respublica quousq; amœnam imitatur Veris aut æstatis viriditatem, eousq; fecunditatem amat, flores Ciuium progenerat: Postquam verò satiata annis succumbit, rarò aliquid dignum posteritate in ea apparet, aut si affulserit, momento tanquam decrepitum euanescit. Quis ergò succensebit cruditorum labori, qui præstantissima Rerumpub. decora, obliuioni subtrahunt, squallidæ verustati situm adiungunt, cineres & fauillas in



monumentis colligunt, & ex his clarissimorum Virorum Mausolæa, Pyramides, columnas ædificant, in quibus feri legant nepotes, quam multa præteritæ ætatis debeant Heroibus, quantum pro Patria fortunarum, laborum, sanguinis profudissent ij, quibus calamo immortalitas est vindicata. Vitreis quondam columnis cadauera includebant Æthiopes, vt simulacra virtutum posteris ad imitandum proponerent; imagines in celebri pompa funeris præferebant Romani, vt Ciuium animos, ad Maiorum facinora egregia contemplanda excitarent: Quid nos Sarmatæ? Soli ne cum corpore immortalem animum sepeliemus! soli ne eundem vitæ terminum & gloriæ statuemus! Imò vt nulla natio gentem nostram fortitudine & æternitatis desiderio superat, ita pluris Poloniam virtutem æstimabit, si & viuenti honor, & mortuæ Diuinitas adscribetur. Animosè proin accedo ad Aram LVBOMIRSCIANO Nomini erigendam, quod vnà mecum omnes altioris prudentiæ testes fateantur, in homine præter ea quæ terrestri consortio debet, esse aliquid nobilius, excellentius, nec vlli vetustati subiectum, ac propterea victuræ memoriæ conseruandum. Conseruaberis à me, quanquam pusillo & imbelli Oratore, Magnū Poloni nominis decus Illustr: P A L A TINE: quidquid Pallas mea immortale habuit, id in funere Tuo declarare cupiet, & æternū duraturā lampadē in Ara gloriæ Tuæ accendet. Ælio Pertinaci Imperatori Romanorū vitæ functo inter cætera funebri pompæ ornamenta, Aram quoq; inauratam, ebore & pretiosis lapillis Indicis radiantem adfuisse testatur Xiphilinus Insignia hæc, sed vanitati superstitiosæ accommodata sunt: longè ditior mihi thesaurus est, è quo ornamenta, nullo vnquam pretio æstimanda colligi, & ad Aram immortalitatis LVBOMIRSCIANÆ excitandam transferri debent. Aurea ibi, eburnea, gemmeaq; ostentatio, ac proinde ignobili etiam dummodo opibus affluentem communi; LVBOMIRSCIANVS splendor sacer, triumphalis, è Capitolio cælesti deriuatus, in quem nihil auaritiæ, nihil anis, nihil obliuioni licet. Hic me felicissimum quispiam putasset Oratorem, quod non vt alijs paupertatem argumenti incusare, sed inter opulentam rerum vbertatem singularem tantum delibare possim: Idem & ego à principio sentiebam, ast nunc elinguem me facundia fecit, inopem copia, rerum maiestas pauperimum. Si enim armatæ felicitatis decora suspexero: habent hæc pridem erectam Orbis vniuersi Aram. Si togatæ



gatæ prudentiæ merita venerari desidero, cælestibus iam fastis  
 inscripta, mortales calamos despiciunt. Sed me illud erigit  
 solaturq; , nemini interdictum esse lares domesticos quàm ma-  
 ximo cultu prosequi: imò ea quæ priuata propensio effuderit,  
 potiora habentur illis, quæ publica ambitio comminiscitur,  
 eò quod in illis candor nulla beneficiorum obstrictus seruitute  
 elucescit, in his simulatam ad tempus venerationem donec me-  
 liora eueniant, suspicamur. Primum Aræ LVBOMIRSCI-  
 ANÆ fundamentum, sanguis tot sæculorum ordine in Magnū  
 hunc Herbem deriuatus, constituet. Nec verò existimet quis-  
 quam in animo mihi esse, adeò vetustissimæ Gentis primam o-  
 riginem scrutari, atq; sic longa Auorum & Atauorum seriè, in-  
 gentem quandam molem substruere. Gentis LVBOMIR-  
 SCIANÆ qui maiores habere vult numeratos, eadem facilitate  
 reuocet ad calculum guttas, in gentilitio eorum Stemmate  
 SRENIAVA contentas. Puerile est, & superstitiosæ cuiusdam  
 diligentia opus, velle ea rudi calamo posteritati transmittere,  
 quæ etiam doctissimorum effugiant animos. Idem familiæ  
 huius, qui & solis splendor est. Namq; vt illius radios nequa-  
 quam vnica aut altera Orbis portione circumscripseris; Sic  
 LVBOMIRSCIANÆ Gentis sydera intra vnus angustias pe-  
 ctoris frustra requires: Omnium scrutare corda, omnium men-  
 tes introspecte, & postquam consensum perspexeris, mirare po-  
 tius felicissimam Gentis huiusce propaginem, cui ne ipsa qui-  
 dem Regina Eloquentia parem in celebrando afferre potest  
 Maiestatem. Finge enim mihi mellitissimos, aut si vis nectare  
 Deorum educatos Oratores: Quis illorum ad Antiquissima il-  
 la KMITARVM, MIROSLAVIORVM, WIERZBOSLAVI-  
 ORVM Comitum in Nakiel nomina, nō obmutescet? quis ad  
 nobilissimas cognationes OSTROGIORVM Ducum & ZA-  
 SLAVIORVM, KONIECPOLIORVM, ZAMOSCIORVM,  
 ZEBRZYDOVIORVM? Quis ad affinitates veteres SRZE-  
 NIAVIORVM cum GORCANIS, STADNICIJS, MELSTI-  
 NIIS, TARNOWIIS, ODROWAZIIS infantiam suam non pro-  
 fitebitur? cum verò ab hisce fluuijs ad Oceanum LVBOMIR-  
 SCIANÆ gloriæ deuentum fuerit, quis in tam spatiofo opere  
 vires & imbecillitatem propriam non inculfabit? Submittendi  
 nempe sunt fasces Oratorum, quoties ad LVBOMIRSCIANÆ  
 Gentis ornamenta accedimus; imò plùs hic venerationis si at-  
 tuleris quàm verborum, Tibi & operi Tuo æternitatem facilius  
 comparabis. SEBASTIANVM LVBOMIRSCIVM Castell:



Voynicensem, Illustrissimū quem deflemus Palatini Parentem, quisquis pro dignitate & meritorum amplitudine celebrare voluerit, Isoeratis panathenaicum imitetur. Suffecerit Heros iste omnibus illis, qui gloriam è Lubomirsciana felicitate de prædicanda aucupari vellent. Hoc enim erat speculum & exemplar absolutissimum, eius gloriæ, quàm à pietatis antesignano Ecclesia: à Ciue, milite, Senatore, Patria: à Sreniauiæ Gentis fidere omnium expectatio reposcebat. Et quanquam satis Reipub. satis posteritati oraculum istud omnis prudentiæ vixisset, longè tamen felicius immortalē nomen inde adeptus est, quod florem hunc suauissimum, & velut pretiosam gemmam communi bono reliquisset, Illustrissimum nempe Palatinum. Olim quoties Imperatorum Romanæ Urbis corpora cremabatur, ut populus Diuinitatē mortuo Cæsari adscriberet, id commentum Romani inuenerant. Pyra in qua corpus positum erat Imperatoris accensā, mittebatur è summo culmine inter densas vaporum & fumi nebulas Aquila, quæ cum æthera petisset, religio omnibus incussa erat, animam defuncti ad destinatam sibi Capitolij cælestis sedem euolasse. Nonne idem in funere Magni illius Herois SEBASTIANI LVBOMIRSKI contigit. E cineribus Aquila nata, non quidem cælos petijt, sed ad præsidium & ornamentum Sarmatiæ, Generosum spiritum hucusq; conseruauit. Aquila erat Illustr: Palatinus, quia mentem eā à Parente suo hauserat, ut tanquam è nubibus mortalia despiceret: Aquila erat, quia Ioui fulmina, hoc est VLA-DISLAO in immanissimum Orbis piratā Osmanum, belli consilia ministrabat: Aquila deniq; erat, quia velut illa Augusti Cæsaris super Aras, aut Maximiani supra templi verticem morabatur, pietatemque hæreditariam expansis alis, & obumbrabat, & protegebat. Et hic iam sponte recluditur mihi thesaurus, è quo pretiosissimi vniones depromendi sunt, ad Aram LVBOMIRSCIANÆ felicitatis magnificè adornandam. Deueni ad cunas, & primos nascentis Aquilæ vagitus, & cum fascias intueor pueriles, viduatas infante nouello reperio. Itanè Magnatum primordia nihil humanitati commune habent? Itanè licitum est, clarissimorum in Repub: virorum filijs ordinem naturæ immutare? Delicias ego, voluptates, summum otium in Aulis Senatorum surgentibus pullis designabam; at ecce in hoc infante video, maiori curâ pueritiam Principum, licet inter summas opes constare, quàm tenuiorum inter infimam paupertatem. Sed notissimum est, Aquilas prius prolis suæ oculos



los ad solem exponere, aciem explorare, inspirare audaciam, quam volandi illis permittant libertatem: Ita Magnatum filij, vix in lucem hanc expositi, à parentibus è cunabulis tolluntur; splendorem ferre assuescunt, atque sic domestica latibula, prius contemnunt, quam agnoscant, nec nisi sub dio æternitatis lauream merentur. Abfuisse itaq; infantem hunc à fascijs nemo miretur. Ad solem parentis iussu tenellam oculorum aciem intendebat: ibi teneritudinem, mollitiem, delictiorem vivendi normam deponens, ubi per ætatem omnibus discere licet, quæ virum efficiant, quæ Polonum deceant, quæ in splendore publico, nisi ante perspexerimus, erubescere necessum est. Maturuit autem Aquila hæc, priusquam vota omnium sperauerant, quia ibi nutriebatur, ubi omnia præclara ante ætatem adolescunt. Felicissimus ille nidus erat, qui tanti pulli Tyrocinia spectavit: Aula illa Lubomirsciana nihil aliud nisi Templum pietatis, domicilium ac sedes virtutum omnium, Sacellum victoriarum appellabatur, vnde nullibi citius prætextam adolescentuli sumebant, quam in hac domo, in qua Seminariū quoddam omnis prudentiæ & felicitatis fuerat constitutū. Hic aliquis excursurum me in laudes & negotia floridæ ætatis putabit, suspendet animum ad primæ instituta iuventutis, & quonam modo ad tantum gloriæ fastigiū Heros iste peruenierit, perscrutabitur. Fecissem ego, nisi me maiora expectarent. Illis ego hanc relinquo Prouinciā, qui nesciunt Magnos viros velut Phœnices adultos è cineribus nasci, quibus idem ætatis, quod & virtutis principium. Neq; enim exotica illis res est præclare agere; Domi ea habent, quæ alij peregrino debent præceptori; & quæ priuati in Historijs & monumentis scriptorum, tanquam miracula venerantur, ea Heroum filij domestico vsu edocti, prius aggrediuntur & perficiunt, quam antea extitisse didicerint. Egreior proinde cum egresso in splendorem Reipub: Illustris: Palatino, & cui in cunis vmbra paternæ calamus velut tenello præludebat, ei nunc submisso cultu famulabitur; Dispar enim crescenti & maturæ virtuti debetur obsequium. Ciuem Polonum, tanquam Bellonæ genuinum pullum, è gremio parentis castra suscipere consueuerunt. Vsitatum hoc Aquilonari plagæ, postquam aliquis è priuata educatione emerferit, militiæ eum adscribere, Gentis commodo, & naturæ propensam bellicam virtutem voluntate. Et certè, vicimus Sarmatæ omnes alias nationes, solo armorum desiderio: & quamuis vincimur aliquando bellorum

pruden-



prudenti regimine, Martis tamen amore, & contemptu periculorum ceteros superamus. Ex amplexu parentum, è rosetis, & dulcedine priuati otij, ruimus imbelles licet pueruli, quoties Martem per Prouincias incedentem prædicat rumor communis, quoties salus publica periclitatur, nec quidquam tædiofius nos Sarmatæ toleramus, quam pacem nullius periculi consciam, aut nimia felicitate sepultam. Hinc nata celeberrima illa, & orbi vniuerso notissima Militiæ palæstra, quam ad extremos fines Russiæ à tot sæculis ereximus; Ex qua quotquot Atlantes, Scipiones, Camillos in Polonia rediuiuos Europa miratur, prodierunt; Ex qua T A R N O V I I, CONSTANTINI Ostrogæ Duces, Z A M O S C I I, Z O L K I E V I I, K O N I E C P O L I I, P O T O C C I I antiquæ ætatis Imperatoribus pares, & nisi præsentia contemneremus, maiores quotidie pullulant; Cuius institutionem Moschus, Suecus, Scythes, Othomannus, aut ignominiosa fuga, aut miserrimo interitu comprobauit. Hanc olim Pericles ille Roxolanus, Magnæ in dicendo & scribendo libertatis Orichonius, Augusto Regi summoperè commendabat, dum eum è penetralibus patriæ & vmbatili vita, in illam Russiæ amænissimam, sed & fortissimorum virorū fecundissimā euocaret regionem. Quia ergo Polonum se esse Illustrissimæ huius Heros nouerat, eo contulit ad præclara natæ generosæ mentis propensionem, ybi velut ad lydium lapidem assurgentis animi indolem exploramus. Excepit hoc Triumphatricis familiæ pignus amæna fronte Bellorum ille Deus Mars, ex osculabatur futurum Orientis terrorem, suspiciebat altissima quæq; voluentem animum, & tantum Numinis sui cultorem felicissimis auspicijs medias inter acies aduenisse gratulabatur. Nec immerito. Quem enim in admirationem simul & amorem nō traxisset indoles illa, vltro honesti instinctu & virtutis dulcedine, ad summa præuolans, Animus ingens & potens sui, gloriæ appetens, immobilis ad metum & pericula? Quem candidus oris & animi consensus, suauitas morum, in factis dictisq; constantia, cum amicis benignitas, cum subiectis humanitas, cum omni genere hominum comitas, vltro vinculis amicitiae non coarctasset? Quem deniq; ardor ille in Tyrocinio militari, ad magnam expectationem non erexisset? dum primus speculatum hostes in desertis ire, parantes irruptionem præsentire prædicereq; perpetuo sub dio degere, eodem tempore inopiam & laborem tolerare, oculos in somnum non conuiuere, ad quemcunq; sonitum aures oculosq; circumuertere, adeo illi familiaria



ria fuerant, vt velut speculum quoddam alijs, ad quod se actionesq; suas conformarent, à primarijs Belli Ducibus, proponeretur. Sed nequaquam hic stetit Sarmatici huius Themistoclis solertia: omnino illi debebatur amplissimum aliquod theatrum, in quo LVBOMIRSCIANA fortitudinem Orbis, spectaret vniuersus. Xerxem potentissimum requirebat, de quo ignominiosissime fugiente, triumpharet eò felicius, quò maior calamitas, si in caput authoris recidat, vberiore lætitiâ subministrat. Nec diu vota fefellit aduersa nobis, LVBOMIRSCIANÆ virtuti addictissima fortuna. Ceciderat flos, ille exercitus nostri inauspicato fidere in campos Cecorienes translatus, & immanissimæ gentis Othomaniæ falcibus succisus, eandem Poloniæ ruinam portendebat. O quàm horrenda temporis illius recordatio! quàm misera orbate Patriæ facies! quanti gemitus! quis Prouinciarum Urbiumq; meror! & ante occasum funebre spectaculum! Quid verò dicam, cum inebriatus fortunæ indulgentiâ teterimus ille Orientis Tyrannus, omnes nos crudeli militum prædæ deuouebat, ac proinde euocatis omni ex Imperio, quod latissimum habet, populis, & in nostram perniciem armatis, ad fines nostros plenus spei, plenus lætitiæ, plenus destinatæ victoriæ, Xerxem illum Persarum Regem potentissimum imitatus, immensam latronum vt & ipse multitudinem trahebat. Hic quæ voces perichitantis Patriæ fuerint? quæ trepidantium suspiria? quam vicinus Regno interitus? ille non intelligit, qui Turcarum potentiam, & absorbendi imperia desiderium nescit. Ibat superbus ille Imperiorum deprædator, inter lætas acclamationes, & solennes ante victoriam triumphos, inter obsoletorum greges, inter exquisita luxus ac libidinis instrumenta, & famâ aduenientis Tyranni, ubiq; metum, lachrymas, quotidianas mortes incutiebat. Restitère tamen tria illa Septemtrionis Numina VLADISLAUS, CHODKIEVICIUS, & Magnus hic cui parentamus LVBOMIRSCIVS. Principis VLADISLAI admiranda felicitas, CHODKIEVICII tot bellis probata fortitudo, LVBOMIRSCII Heroica & laudata iam in Scytharum ad Leopolum vsq; excurrentium cæde dexteritas, concordibus votis sociatæ, impetum ruentis belluæ represserunt. Omnium tamen celerrima LVBOMIRSCII promptitudo efferebatur, quod dum plena rumoribus infauisti Poloniæ perfonaret, & in dies pericula augerentur, assumptis proprijs cohortibus, & promptissimo quoq; excito, ad quintum Kalend;



Iun: castra ad Skálám oppidum posuerit, ex quo loco vnde in  
vltiora spes sumi posset, prouidè admodum decernebat.  
Quæ verò tum illius cura, quod castrorum regimen fuerit, lo-  
quatur pro me, specimen illud Historicorum Sarmatiæ, eru-  
ditæ prudentiæ miraculum, ille inquam Tacitus Polonus IN-  
NOCENTIVS PETRICIVS, in ea quam posteritati confi-  
gnauit Historia. Ipse (inquit Innocentiæ litteratæ delictum)  
in castris, nihil cæterorum extra curam suam pati, clàm fidissi-  
mos ad hostes submittere, consilia eorum penetrare, exercitui  
commeatum conuehere, alimenta parare, machinas & tor-  
menta cuiusq; generis explorare, reficere, iuxta ac si hostes ad-  
essent stationes, ordines, vigilias intendere, fortissimum quemq;  
alios militiâ, alios famâ cognitos ambire, accireq;, præsentis  
interuifere, alloqui, hortari. Mouit exemplum & inuitatio;  
breuiq; alij se copiasq; castris intulere. Hoc LVBOMIR-  
SCII in monumento æternitatis elogium. Neq; verò defer-  
buit ardor ille dum ad pericula ventum est, utq; alios celeritate  
antecefferat LVBOMIRSCIVS, ita prior omnibus hosti  
electus est, in quo omnium virtutem exploraret. Præmise-  
rat Turcarum bellua Kantimirum, qui primordia fortunæ bel-  
licæ auspicaretur: hic licet barbarus, non errauit tamen, dum  
ex Aquila omen victoriæ, aut interitus cognoscere voluit.  
Antiquitus creditum Aquilam secretorum Iouis consciam es-  
se, & si fulmen portaret belli nuncia, si ramum oliuæ rostro te-  
neret, pacis prognosticon habebatur. Aquilam putauit Kanti-  
mirus LVBOMIRSCIVM, quod perniciousis alis primus ra-  
pacissimo Orientis accipitri occurrisset, sed nescierat fulmennè  
Aquila, an oliuæ ramum circumferret. Exploraturus itaq;, ,  
quemnam fata immanitati Machometanæ terminum assi-  
gnassent, cum quinque millibus Scytharum, nostros necdum  
vallo, aut munitione castrorum obarmatos aggreditur. Maxi-  
mo impetu LVBOMIRSCII portam oppugnare, & quasi  
è conducto penetrare satagebat, sed Aquila ut se hosti genero-  
sam & Principem auium probaret impatiens oppugnationis in  
apertum prorupit. Feruebat in hoste acrior vis decertandi,  
& quia omen inde tanti belli sumebatur, quidquid Scythica  
potuit ferocia, ad terrorem & futuri belli potentiam effunde-  
bat. Aduertit hunc ambitiosæ crudelitatis in hoste animum  
LVBOMIRSCIVS, & vbi prælium crescere, ac Tartaros  
magnâ vi incumbere videt, cum sua cohorte in confertissimos  
celeriter inuolat. Nec diu sustinuit pertinacia fortitudinem,  
& quam-



& quamuis aruspicum officio fungebantur, deferuerunt omnia, & syluis quæ propè aderant dedecus & fugam occultarunt. Ita semper LVBOMIRSCIO primitias laborum & gloriæ fortuna præparabat, ita iam tum Polonam nobilitatem admonerat, cui postea sublato belli Duce, onus victoriarum & trophæa decernerentur. Et quanquam Heroica hæc, & verè LVBOMIRSCIANA facinora omnium consensu laudem meruerant, inuenit tamen addicta SRENIAVIIS fors, vnde non solum ex hostibus, sed & commilitonibus triumpharet. Inuaserat fames, domesticus & eo crudelior hostis tentoria Cosacorum; bellicosæ illæ animæ, passim inopiâ victus languebant, & ad quorum splendorem Othomannica Luna toties expalluit, illi velut viua mortis simulachra incedebant, emoriebantur, & quia ab ignauissimo hoste, Martia illa pectora ignominiosam mortem exhorrescebant. Vidit hoc LVBOMIRSCIVS, & quia amore summo felicitatem Patriæ complectebatur, indoluit adeò crudele malum, & egestate publica famosum, Bellonæ deuotas mentes populari. Inuenit tandem virtus publicæ cladi remedium: Exundauit SRENIAVA, & quidquid in profundo latebat, expanso sinu necessitati aperuit. Venit in mentem LVBOMIRSCIO hæreditarium SRENIAVIIS esse, Nilum paruo licet fluuiolo æmulari, nec maiorem aliundè gloriam petere, quàm si in limpidissimos fontes, quidquid est LVBOMIRSCIANVM sitienti Patriæ diffundatur. Atq; vt Nilus agros Ægyptiorum postquam exundauerit fertilissimos reddere solet; sic vt primum SRENIAVA LVBOMIRSCII, sterilia castrensis inopiæ arua, liberali cursu permeasset, succreuit opulenta illa mellis, quæ & famem quotidie ingrauescentem sedauit, & recreatas Cosacorum vires vltiori fortitudini accinxit, & LVBOMIRSCIIS aureos honorum immortalisq; memoriæ annos comparauit. Moritur tandem Epaminondas Sarmaticus CHODKIEVICVS, & quem adeò in promouenda belli fortuna promptissimum agnouerat Heroem, in eundem ius omne belli pacisq; transfert LVBOMIRSCIVM. Felicissimus erat CHODKIEVICVS, quod per continuos victoriarum cursus, iam propè confecto feliciter bello, velut in triumpho interq; laureas moreretur, longè tamen felicior, quod præstantissimum Belli Ducem Exercitui reliquerit, & in eo sinu salutem Patriæ, spem, & futuros euentus reposuit, vbi omnis felicitas suauissimè conquieuerat. Recepit arduum hoc munus



LVBOMIRSCIVS, & vt erat pietatis religionisq; cultor celeberrimus, inde regiminis exordium ducit, vnde afflictis certissimum solatium pollicemur. Vix enim à colloquio extremos spiritus ducentis CHODKIEVICHI recesserat, positus humi, multis precibus & votis imploratâ coelesti ope, salutem totius exercitus cum fortuna sua DEO addixit, vouitq; Templum illud Vîsniciense, LVBOMIRSCIANÆ Magnificentiae æternum monumentum. O Diuinam tanti Herois pietatem! O pectus omni compendio virtutum consecratum! Non miror iam turpissimè Belluam illam Orientalem supplicasse, & amissis tot primarijs Ducibus, tanta strage veteranorum, tam ingenti Turcarum cæde ignominiosè ex acie decessisse, pontemq; documentum victoriæ, per quem copias traduceremus, reliquisse: LVBOMIRSCII etenim religiosa fortitudo dedecus illud Orbis fugauit, nec adeò virtus nostra, quanquam stupenda erat, quàm DEI nobiscum pro LVBOMIRSCIO decertantis præsentia, strictos in perniciem nostram acinaces hebetauit, contuditq;. Abijt ergo Osmanus laceratus ac propè exutus exercitu, abijt pænas temerarij furoris daturus, abijt fabula Orbis vniuersi, ludibrium fortunæ, victi Orientis opprobrium, Sarmaticæ virtutis miraculum. Huius ego spolia in Aram Lubomirscianam depono, posteritati obsigno, & quemadmodum olim pellis leoni Nemæo detracta, templis & statuis Herculis apponebatur, ita Themistocli nostro Polono Lubomirscio, Xerxem Othomannicum, propriæ Gentis manibus dilaniatum, pro insigni victuræ gloriæ constituo. Sed me diutius castrensis detinuit apparatus; an quod Polono Ciui prima è castris nobilitas; an potius quod nullibi operosior diuturniorq; gloria, quàm in bellis patriæ salutem defendentibus acquiratur. Quidquid sit, certum tamen est, Polonos omnium gentium linguis idè celebrari, quod Martem alibi peregrinum, nos Ciuem & incolam fecerimus, nec vlla facilior apud nos emergendi via est, quàm quæ fortitudine & militaribus trophæis constat. Magna sunt & illa quæ pacem, & Regni quietem tuentur, quæ prudentiæ Ciuiuli adscribimus; sed quia inter ea rarus cui ambitio, aut simulata non adscribatur politics, securius proindè bellica laude excellimus, in qua tutiora sunt omnia, quia à latere Principis remota, cuius familiaritate nihil propius ad inuidiam, & aliorum exulcerandos affectus. Redeo ad Illustriss. Lubomirscium è strepitu bellico ad Senatoriam tranquillitatem redeuntē.

Toga-



Togatam in eo felicitatē iubent celebrare rarissimæ virtutes, & ad exemplum cæteris efformatæ. In quo enim felicius Senatoria, Ciuilis, & priuata laus enituit? Postquam amplissimos honores virtuti & meritis debitos recepisset Illustriss: L V B O - M I R S C I V S, salutauit eum simul & suspexit prudentissimum Patria Senatorem. Cùm etenim Respublica Polonæ, maximum in ordine Senatorio conseruandi Imperij reponat firmitamentum, ita huic satisfecit desiderio, vt in eo & Reipublicæ amor, & in rebus arduis consiliorum felicitas, & in omni genere Politici status rara & consummata prudentia, ab vniuerso Ciuium ordine laudaretur. Nec aliud iudicium de illo miraculū illud æui nostri, VLADISLAVS IV. REX olim felicissimus habuit, Quidquid solidam, quidquid defæcatam & multo vsu edoctam requirere videbatur prudentiam, Illustriss: L V B O - M I R S C I I censuræ permittebat VLADISLAVS. Quoties Illustriss: Lubomirscius de Reipub: negotijs differebat, quoties impendentia mala, solutam disciplinam, violatas leges, libertatis iniurias, in facie totius patriæ graui illa & verè Heroica eloquentia discutebat, omnes rediuiuum Poloniæ Catonem mirabantur, pendebant ab ore dicentis, & quidquid statuere aut vindicare decernebat, applausu totius populi decernebatur. Neq; verò solius hoc bonum Poloniæ fuit; Superauit limites Imperij nostri, & amorem exterarum gentium venerationemq; promeruit. Quem enim è Poloniæ proceribus adedò in delicijs & perpetuo cultu Principes externi habebant? præter Magnum hunc Sreniauiæ gentis Heroem. Pepererat autem illi hanc propensionis, & obseruantia tesseram; illa quam suspeximus prudentia, quæ etiam inuidos, prout sunt alieni Principes, eum qui tâta virtute celebratur, primùm suspicere, sensim extollere, ad extremum amare cogit. Ad cuius consortium virtutis venerat quoq; publica Magnificentia. Vidisses Lubomirscium, quoties dignitas Patriæ requirebat, quoties Polonum decus exteris erat ostendendum, nihil præstantius duxisse, quam splendorem priuatum, & quidquid pretiosum prouida Maiorum diligentia seruauerat, Reipub: donare, & opulentiam Regni communem, priuato quod rarissimum est, luxui anteferre. An non illa verè Heroica Magnificentia fuit? ad defendendos patriæ fines iustam militum manum alere, & dum necessitati occurrendum esset, nulli sumptui, nulli labori parcere, vt quam firmissimum Patriæ præsidium è Lubomirsciana liberalitate proueniret. Quantum verò Poloniæ ornamentum addiderit virtus



hæc, an quisquam est, qui non intelligat? Ex omnibus quæ ad splendorem Regni nostri erexit monumentis, sufficit illud victoriarum Sacrum, vnius Mæcenatis Magnificentiae miraculum, Templum VISNICIENSE, quo ne Regiæ quidem opes excellentius quidquam fingere possent. In hoc opere declarauit LVBOMIRSCIVS, quam immortalis memoriæ auidissimam mentem habuerit, quantum publicæ laudi & Poloni nominis gloriæ studuerit, quidnam Magnates patriæ debeant, & quomodo posterorum amorem consequi possint. Hoc tandem est, quod omnes crepamus, nemo aggreditur, futuræ ætati seruire, nepotes ad egregia facinora inflammare, & præsentium eam curam habere, ne senectutem aliquando sentiant, ne squallore vetustatis deleantur. Hæc in publicum merita, superficie tenus delineata, quia omnium opes, myrothecia, & suauitatem superant Oratorum. Quanquam priuatim nihil ego eum inuenio egisse, quod non ad integritatem communem spectaret. Illi hoc familiare, qui latibula domestica quærunt, ne in omnium oculis velut noctuæ rideantur. Magnis viris etiam in cubiculo theatrum est; nihil ibi moliuntur, nihil perpendunt, nisi quod omnibus proficit; & quia vita Heroum velut norma ab alijs obseruatur, cauent proinde ne se occultent, ne secretos quærant recessus, quorum vmbra tenuiores raro in bonam partem interpretantur, imò quidlibet facilius in Senatore ferunt, quam solitudinem, & ex longinquo viuendi modum. Quidquid splendidum, quidquid diu amicum est, tenebras & noctium fraudes detestatur; plebeia & angulorum carceri assueta mens, nihil molestius reputat, quam conspici, & iudicia intuentium expectare. Vita Illustriss. Palatini priuata nunquam fuit. Quam olim Pollio vitream domum exoptabat, eam Visnicii spectauimus. Omnia patebant, omnia cernebatur, quia omnia digna elogijs & admiratione fuerant. Ibi licuit intueri LVBOMIRSCIVM velut alterum Robertum, insigni pietatis ardore incensum, inter candidas innocentiae columbas, inter illa pulcherrima Carmeli lilia, quibus ipse hortulum plantauerat sedentem, psallentem, Diuinæ bonitatis opera contemplantem. Ibi vidisses agmina Religiosorum, pauperum cætus, afflictorum turbas, egentium multitudinem, sub patrociniū liberalitatis confugientem, nec vllō vnquam tēpore spe sua frustratam. Ibi suspiceres nuntios à diuersis Principibus missos, Nobiles opem accisis rebus expectantes, subditos iniurias velut Parenti clementissimo deferentes, Aulam impleuisse. Quanquam



quam etenim corpus eius, augustæ mentis domicilium, laboribus, partim bellicis, partim Ciuilibus fractum & debilitatum, continuò languore premebatur; vigeat tamen & felicissimè triumphabat inuicta animi constantia, imò quo minùs virium fragili corpusculo inerat, eò robustior, generosior, & immortalitati propior anima, mortalia velut infima contemnebat. Aduertit hunc in Illustrissimo LVBOMIRSCIO cælestia voluentem animum Libitina, & ne diutiùs terrestri hospitio immortale donum detineretur, præter omnium spem, tam periculoso Reipub: tempore, inter vberrimas omnium lachrymas fragile quidquid erat & terrenum dissoluit, animam Magni Herois ad beatarum mentium societatem aggregauit. Nunc Tibi Polonia velim reuoces, quid in tanto Heroe amiseris, quid meritis eius debeas, quod Te fatum maneat, dum non nisi pretiosissima quæq; è sinu Tuo rapiuntur. Perdidisti in LVBOMIRSCIO, quidquid adhuc antiquæ felicitatis latebat. Quousq; Vir hic cælesti fauore seruabatur, recurrebat in animum prisca illa Polonorum fortitudo. Ille enim fuit in quo fortuna seipsam vicit, in quem virtus quidquid ubiq; celeberrimum habebatur congererat, in quem Patria Cornu copiae honorum effuderat. Ille fuit Osmani fugientis terror, Scytharum fulmen, militiæ speculum, prudentiæ ciuilis archetypum; in quo apex supremus gloriæ steterat, nec inuenire potuit, quo iam altius desiderium Magni nominis euolaret. Quoniam ergo non lachrymas, sed Aram Æternitatis Illustriss: LVBOMIRSCIO promissimus, hanc ego virtutum insignijs adornatam, & Othomannicis trophæis illustrem, in Templo Sarmaticæ gentis amplissimo constituo. Venient sæcula, quæ aurea nobis tēpora viuente LVBOMIRSCIO, inuidebunt. Stupeat & veneretur posteritas, quæ nobis cælesti dono videre licuit & admirari. Tu verò Illustrissima LVBOMIRSCIORVM Domus, Aquilam fulmen pedibus tenentem Aræ imposito, & ne Spartacus Poloniæ immineat, Aram illi hanc opponito; fieri non potest, vt quem viuum Oriens timuit, eius mortui cineres, vile mancipium non exhorrescat.

D I X I.













